

Bases reguladoras do concurso para a concesión de subvencións para o fomento do Termalismo Saudable, Cultura Termal e do Programa Termal contra a Soidade Non Desexada, na provincia de Ourense, correspondente ao exercicio 2023.

Primeira. Obxecto e beneficiarios.

Constitúe o obxecto das presentes bases a regulación da concesión de subvencións destinadas ao fomento do lecer saudable nas instalacións balnearias da provincia de Ourense, mediante concorrencia non competitiva, a través do procedemento previsto no artigo 19.2 da Lei 9/2007, do 13 de xuño, de Subvencións de Galicia, e no artigo 8 da Ordenanza Xeral de Subvencións da Deputación Provincial de Ourense (BOP nº 260, do 12 de novembro de 2015).

A concesión de axudas ás que se refire esta convocatoria realizarase de forma continua, ata esgotar o orzamento previsto, segundo a orde de recepción das solicitudes e baixo os principios de publicidade, transparencia, obxectividade, igualdade e non discriminación.

Segunda. Relación dos programas de estancias e tratamentos subvencionados. Períodos de realización das estancias.

A través do procedemento regulado nas presentes bases a Deputación Provincial de Ourense concederá subvencións para os seguintes programas:

- 1. Programa de Termalismo Saudable:** este programa abarca dúas modalidades, A (estancias balnearias, con ou sen servizo de transporte en tren) e B (tratamentos terapéuticos sen estancia) co contido que se describe no apartado seguinte.
- 2. Programa de Cultura Termal.** Implica estancias balnearias durante unha fin de semana con entrada o sábado e saída o domingo.
- 3. Programa Termal contra a Soidade Non Desexada.** Este Programa implica o acceso a unha terapia termal colectiva que será definida polo establecemento balneario que a desenvolva segundo criterios sanitarios en atención as persoas participantes, e que se desenvolverá, en grupos de como máximo 20 persoas, cunha duración mínima de 6 meses e máxima de 9 meses segundo o que propoña cada balneario.

Para o acceso a este programa estableceranse dúas vías posibles:

A. Convenio coas entidades locais municipais. Os concellos/mancomunidades poderán solicitar o acceso a un dos Programas dentro dos que propoña cada balneario participante. A selección das persoas participantes en cada programa, máximo de 20 persoas, será realizada polo servizo social municipal e baixo os criterios que este teñan para identificar as situacións de “soidade non desexada”.

B. Teleasistencia Provincial.- As persoas usuarias que cumpran os parámetros de “situación de soidade non desexada” deste servizo da Deputación de Ourense m poderán acceder a estes Programas dos que serán informados telefónicamente e, caso de ser do seu interese, terán un/unha “asistente telefónico” que xestionará a súa participación.

A realización das estancias ou recepción dos tratamentos subvencionados a través destes programas terá lugar entre o día seguinte ao da publicación destas bases e ata o 30 de novembro de 2023 nas datas elixidas polos solicitantes nos períodos ofertados para cada programa.

Os períodos de realización das estancias no Programa de Termalismo Saudable iniciaranse o luns, día de chegada, e ata o sábado, día da saída.

Os períodos de realización das estancias no Programa de Cultura Termal iniciaranse o sábado, día de chegada, ata o domingo día de saída no Programa de Cultura Termal.

Os períodos de tratamentos vinculados ao Programa de Soidade Non Desexada desenvolveranse segundo o calendario ofertado polo balneario elixido e co que se suscriba o convenio.

Terceira. Descrición do Programa de Termalismo Saudable.

A. Estancias

A.1 Estancias balnearias: nesta liña A.1 subvenciónanse estancias das persoas beneficiarias nos establecementos balnearios da provincia de Ourense de 6 días de duración (5 noites) de luns a sábado (en réxime de habitación dobre compartida, sen prexuízo do previsto na base cuarta, apartado 3) pensión completa (incluíndo nesta pensión completa a bebida), 10 técnicas balnearias, posibilidade de revisión médica dos beneficiarios, (sempre que o demanden) e programa de animación social. Os Balnearios poderán establecer quendas de estancia con Servizos de traslado ida e volta (luns e sábado) desde os puntos de partida ata os Balnearios. A xestión e posta ao dispor dos

billetes e realización dos Servizos será responsabilidade dos Balnearios.

A.2 Estancias Balnearias + Tren: estas subvencións financiarán as estancias balnearias conforme ao previsto no apartado A.1, e ademais os beneficiarios da subvención poderán adquirir os billetes de tren (ida e volta), desde algunha das “estacións termiais” que participan neste programa e que se refiren no convenio subscrito entre Deputación de Ourense e RENFE ata a estación de Ourense. Os balnearios proporcionan servizos de traslado (ida e volta) dende a estación de Ourense ata os balnearios seleccionados e roteiros culturais.

A xestión da adquisición e posta ao dispor dos billetes de tren, así como os traslados entre a estación e os balnearios e os roteiros culturais que se propoñan en cada unha das semanas serán responsabilidade do balneario no que o solicitante desexe gozar do programa e non implican ningún gasto de xestión. O custo do billete, que será aboado polo beneficiario, incluírá a tarifa prevista por RENFE para este programa e o importe aboado polo beneficiario en concepto de traslados e roteiros culturais (estación de tren de Ourense/balneario/estación de tren, roteiros culturais) establecido polo balneario para este servizo.

B.- Tratamentos terapéuticos (sen estancia).

Os tratamentos terapéuticos sen estancia (reumatolóxico e respiratorio) inclúen, en todos os casos, consulta médica á chegada do beneficiario ao balneario.

Os tratamentos terapéuticos ofertados neste Programa poderán ser de:

- 35 técnicas balnearias repartidas ao longo dun máximo de 15 días.
- 20 técnicas balnearias repartidas ao longo dun máximo de 15 días.
- 10 técnicas balnearias repartidas ao longo dun máximo de 10 días.

O prazo máximo no que se poderán recibir as técnicas balnearias compútase dende o primeiro día en que se comezan a recibir as técnicas.

Cuarta: Descrición do Programa de Cultura Termal:

A.1 Estancias Cultura Termal :Estas subvencións financiarán estancias de fin de semana dos beneficiarios nos establecementos balnearios da provincia de Ourense, de 2 días de duración (1 noite) de sábado a domingo, incluíndo pensión completa, 2 técnicas balnearias para as persoas adultas e, no caso de vir acompañadas por menores de 12 anos, estancia para os/as menores (non poderán ser máis dun neno/a por programa).

No caso de que a persoa solicitante (maior de 18 anos) veña acompañada dun/a menor, este non poderá realizar tratamentos balnearios en ningún caso.

A.2 Estancias Cultura Termal + Tren: estas subvencións financiarán as estancias balnearias de fin de semana de acordo o exposto no apartado anterior (A.1) referente o programa de Cultura Termal, e ademais os beneficiarios da subvención poderán adquirir os billetes de tren (ida e volta), desde algunha das “estacións termais” que participan neste programa e que se refiren no convenio subscrito entre Deputación de Ourense e RENFE ata a estación de Ourense. Os balnearios proporcionan servizos de traslado (ida e volta) dende a estación de Ourense ata os balnearios seleccionados e roteiros culturais.

A xestión da adquisición e posta ao dispor dos billetes de tren, así como os traslados entre a estación e os balnearios e os roteiros culturais que se propoñan en cada unha das semanas serán responsabilidade do balneario no que o solicitante desexe gozar do programa e non implican ningún gasto de xestión. O custo do billete, que será aboado polo beneficiario, incluírá a tarifa prevista por RENFE para este programa e o importe aboado polo beneficiario en concepto de traslados e roteiros culturais (estación de tren de Ourense/balneario/estación de tren, roteiros culturais) establecido polo balneario para este servizo.

Quinta: Descrición do Programa Termal contra a Soiedade Non Desexada. Esta subvención financiará tratamentos termais colectivos segundo a proposta dos balnearios ofertantes e que terán unha duración mínima de 6 meses de duración e máxima de 9 meses duración, durante os que recibirán un tratamento semanal.

O acceso a estes programas será por dúas vías:

- a) Convenio coa entidade local de residencia da persoa interesada. As entidades locais que poderán asinar este convenio son as da provincia de Ourense
- b) Acceso como usuario/a de Teleasistencia Provincial Domiciliaria

Sexta.- Réxime xeral dos servizos obxecto de subvención.

1. As subvencións reguladas na presente convocatoria cinguen o seu obxecto aos servizos balnearios sinalados nas presentes bases, entendéndose excluído calquera outro servizo adicional e non previsto nestas bases para cada programa descrito que poida ser prestado polos establecementos aos beneficiarios.

En todo caso, este tipo de servizos adicionais só poderán ser prestados co consentimento dos/as afectados/as sen que se poida impoñer ás persoas beneficiarias a súa recepción.

2. Sen prexuízo da subvención da Deputación, os servizos de estancia e tratamento balneario serán prestados polos establecementos ás persoas usuarias con carácter de servizos persoais, prestados conforme ás condicións contractuais que rexen para este tipo de servizos conforme á normativa turística, civil e mercantil aplicable. A Deputación Provincial en ningún caso será parte na relación contractual entre persoas beneficiarias e os establecementos.

Séptima.- Establecementos balnearios incluídos nos programas subvencionados.

1. Os establecementos balnearios onde se poderán realizarán as estancias e tratamentos subvencionados son os seguintes:

Balneario-Hotel Baños de Molgas.

Gran Balneario do Carballiño.

Balneario Arnoia Caldaria.

Balneario Laias Caldaria

Balneario Lobios Caldaria.

Balneario de Cortegada.

Balneario de Caldas de Partovia.

2. Sen prexuízo do anterior, ao longo do exercicio 2023 poderán incorporarse outros establecementos balnearios da provincia de Ourense que ofrezan condicións semellantes ás definidas nas presentes bases e o soliciten de forma expresa. A inclusión de novos establecementos durante a vixencia do programa de subvencións regulada nas presentes bases farase pública oportunamente a través da sede electrónica da Deputación Provincial. Os establecementos balnearios incluídos no programa terán a consideración de entidades colaboradoras da Deputación, ao amparo do establecido no artigo 12 da Lei Xeral de Subvencións, concretándose os seus dereitos e deberes mediante convenio de colaboración que se subscribirá pola Presidencia no marco do establecido nas presentes bases. Entre outros aspectos, o convenio regulará os deberes de xustificación das subvencións polos establecementos e o deber de darlle publicidade á participación da Deputación no financiamento dos servizos prestados.

3. O tipo de tratamento ofertado dependerá do balneario seleccionado, podendo ser modificado en función da revisión médica dos beneficiarios realizada á súa chegada ao establecemento.

4. Os prezos finais para persoas usuarias dos servizos de cada establecemento, logo da aplicación das subvencións previstas nestas bases, figuran na dirección electrónica <https://www.termalismoureense.com/>.

5. A información detallada sobre as características dos establecementos e dos tratamentos ofertados estará dispoñible para consulta das persoas interesadas, durante o prazo de formulación de solicitudes, na dirección electrónica seguinte: <https://www.termalismoureense.com/>.

Oitava. Beneficiarios das subvencións.

1. Poderán ser beneficiarios das subvencións reguladas nas presentes bases as persoas físicas que reúnan os requisitos que se esixen para cada un dos programas, segundo se expresa a continuación:

Programa Tipo 1. Programa de Termalismo Saudable:

- a) Ter cumpridos ou cumprir no ano 2023, cincuenta anos de idade.
- b) Non padecer enfermidade nin alteración ou contraindicación médica que dificulte ou impida a normal convivencia nos establecementos balnearios.
- c) Ser persoa válida para as actividades da vida diaria.

Tamén poderá ser beneficiaria/ou da subvención, como acompañante, calquera persoa maior de idade que desexe aloxarse nos establecementos balnearios e/ou recibir os tratamentos acompañando a unha persoa que reúna os requisitos sinalados nos apartados a), b) e c) anteriores. Neste caso a súa participación terá que ser pedida de forma conxunta cun/a solicitante que cumpra devanditos requisitos, realizándose de forma simultánea, na mesma solicitude.

Programa Tipo 2. Programa de Cultura Termal:

- a) Ter cumpridos o solicitante, cando menos, 18 anos de idade.
- b) Non padecer enfermidade nin alteración ou contraindicación médica que dificulte ou impida a normal convivencia nos establecementos balnearios.
- c) Ser persoa válida para as actividades da vida diaria.

Tamén poderá ser beneficiaria/o da subvención unha persoa acompañante da persoa solicitante. Nos balnearios que oferten o programa con nenos/as menores de doce anos, poderase engadir un/a acompañante máis menor de doce anos.

A persoa beneficiaria principal e os/as acompañantes aloxaranse na mesma habitación.

Os/as menores de idade non recibirán tratamentos balnearios en ningún caso.

2. A participación das/os acompañantes terá que ser pedida de forma conxunta coa da persoa solicitante, realizándose de forma simultánea, na mesma solicitude. No caso de que o/a titular da solicitude renuncie ou cause baixa, automaticamente o dereito do/a acompañante decae, tendo neste caso que realizar unha nova solicitude se cumpre os requisitos de idade que se establece para cada programa.

3. As persoas interesadas poderán acceder á condición de beneficiario/a solicitando as subvencións individualmente (ben sexa no seu propio nome ou mediante representante) da maneira descrita na base decimosegunda,

4. As/os interesadas/os unicamente poderán solicitar a concesión da subvención para un dos dous programas previstos na base segunda e descritos nas bases terceira e cuarta. Ademais, dentro do programa de Termalismo Saudable só se poderá solicitar unha das súas modalidades. En consecuencia, non se admitirá a formulación de solicitudes para máis dunha modalidade ou programa.

Programa Tipo 3. Programa Termal contra a Soidade Non Desexada

d) Ter cumpridos a persoa solicitante, cando menos, 50 anos de idade.

e) Non padecer enfermidade nin alteración ou contraindicación médica que dificulte ou impida a normal convivencia nos establecementos balnearios.

f) Ser persoa válida para as actividades da vida diaria.

d) Ser beneficiario/a dun Convenio Termal contra a Soidade Non Desexada asinado polo Concello da provincia de Ourense onde resida ou Ser usuario/a da Teleasistencia Provincial Domicilia e ter sido proposto/a para acceder a este Programa

Novena. Disponibilidades orzamentarias. O orzamento previsto para os programas regulados nestas bases é de 105.000,00 € con cargo á partida orzamentaria: 31331 / 20700 dos orzamentos da Deputación de Ourense para o exercicio 2023.

Décima.-. Contía das subvencións e prezos dos servizos.

1. As subvencións terán os importes seguintes:

a) Programa de Termalismo Saudable: Estancias:

60 euros por praza no Programa de Termalismo Saudable, modalidades A.1 e A.2, se o/a solicitante está empadroado/a en algún municipio da provincia de Ourense.

12 euros por praza na modalidade de Programa de Termalismo Saudable, A.1, A.2, se o/a solicitante non está empadroadado/a en algún municipio da provincia.

b) Programa de Termalismo Saudable: Tratamentos Terapéuticos sen Estancia:

84 euros por praza, cando o tratamento terapéutico sen estancia sexa de 35 técnicas ao longo de 15 días.

48 euros por praza, cando se trate de tratamento terapéutico sen estancia de 20 técnicas termais, ao longo de 15 días.

24 euros por praza, cando se trate dun tratamento de 10 técnicas termais, ao longo de 10 días.

c) Programa de Cultura Termal:

12 euros por cada praza de maiores de idade.

20 euros por cada praza de maiores de idade naqueles casos no que se participe no programa dentro dun convenio subscrito cunha entidade adherida na modalidade terapéutica.

A estancia dun/unha menor de 12 anos, no mesmo réxime que os maiores de idade aos que acompañe, unha subvención de **12 euros**, polo que, sendo o prezo do establecemento de 12 euros, estas prazas non terán custo efectivo para o beneficiario.

2. As subvencións recollidas no apartado anterior aplícanse sobre os prezos dos servizos ofertados polos establecementos para as persoas beneficiarias dos programas, determinado nos prezos finais soportados polos usuarios, que figuran na páxina web indicada.

d) Programa Termal Contra a Soidade Non Desexada:

75 euros por praza e persoa solicitante.

Os prezos sinalados na páxina web indicada son prezos finais, incluíndo o IVE actualmente vixente. Se no momento da facturación dos servizos correspondentes se modificase o IVE aplicable, o aumento ou redución do imposto repercutirase na persoa beneficiaria, incrementando ou reducindo a contía para pagar na cantidade que proceda.

Os prezos sinalados son pechados para todos os servizos incluídos en cada praza, sen que exista a posibilidade de efectuar dedución ningunha se por calquera causa a persoa participante non emprega todos ou algúns dos servizos ofertados.

3. A subvención da Deputación librarase directamente aos establecementos termais colaboradores, tras a presentación previa ante a Deputación da xustificación conforme co establecido no convenio de colaboración cos establecementos balnearios.

Décimo primeira.- Forma de pago dos servizos subvencionados por parte das persoas beneficiarias.

1. Os/As beneficiarios/as abonarán o prezo das prazas da forma seguinte:

a) Previamente á formalización da solicitude de subvención e á súa presentación no Rexistro Xeral da Deputación, o/a interesado/a deberá autorizar ao establecemento balneario da súa elección para efectuar, con cargo a unha tarxeta de crédito, a realización dunha retención en garantía do pago da estancia ou tratamento.

b) No programa de Termalismo Saudable (Estancias Balnearias), modalidades A.1, A.2 e A.3, a retención en garantía do pago poderá ser do 100% do prezo total ou dunha cuantía inferior, a elección da persoa solicitante. No caso de que a persoa solicitante desexa que se realice unha retención inferior en garantía de pago, será das contías seguintes:

- A1: 50 € en concepto de reserva de praza.
- A2: 100 € / 50 € segundo o programa de estancias + tren incorpore traxectos de longo percorrido ou non.
- A3: Sen tren, 50 €. No caso de incorporar tren a contía será de 100 € ou de 50 € segundo trátase de traxectos de longo percorrido ou non.
- Programa Termal Contra a Soidade Non Desexada: 75 €

Para os efectos destes programas son traxectos de longo percorrido en tren aqueles que se realizan en dúas paradas, unha delas en tren de alta velocidade.

c) No Programa de Cultura Termal e Programas de Tratamentos Balnearios sen estancia a única opción será a retención do 100% do prezo do programa pedido polo solicitante.

2. A cantidade pendente para completar o pago total da praza, no seu caso, aboarase directamente aos establecementos balnearios no momento da chegada a eles, facéndoselles entrega da factura correspondente. No caso do Programa Termal Contra a Soidade Non Desexada realizarán o aboamento de cada sesión semanalmente, logo de recibir o tratamento previsto no Programa.

3. No caso de que o/a solicitante decida renunciar á praza adxudicada poderá facelo e terá dereito a que se lle libere a retención en garantía, que verá reflectida na súa tarxeta de crédito. Para que poida ser efectivo o dereito a esta devolución, a renuncia terá que facerse cun mínimo de 15 días naturais de antelación á data de inicio do seu programa subvencionado. A renuncia tramitarase telemáticamente a través da plataforma informática. Logo de comenazar a recibir o Programa Termal Contra a Soidade Non Desexada non poderá solicitarse devolución algunha.

No caso de que a renuncia implique unha modificación de datas para a realización do programa, só se permitirá unha única modificación de datas. De producirse unha segunda renuncia a este período alternativo non existirá posibilidade de devolución do importe de reserva.

4. Os/as usuarios/as poderán solicitar unha habitación individual, así como calquera outro servizo adicional ofertado polo establecemento. Estes servizos non serán obxecto de subvención, e serán abonados exclusivamente polo usuario que os solicite.

Décimo segunda. Solicitudes. Prazo, modo e lugar de presentación e documentación esixible.

As solicitudes poderán presentarse desde o día seguinte ao da publicación destas bases na Base de datos Nacional de Subvencións, e ata esgotar o crédito orzamentario, e, en todo caso, sempre dentro dos períodos ofertados durante o exercicio 2023.

1. As solicitudes deberanse realizar telemáticamente, a través da dirección electrónica <https://www.termalismourense.com/>, rexistrándose as mesmas ante o Rexistro Electrónico Xeneral da Deputación de Ourense. O emprego de medios electrónicos para a formulación das solicitudes terá carácter obrigatorio, ao amparo do previsto no artigo 14 da Lei 39/2015, do 1 de outubro, de procedemento administrativo común das administracións públicas, e do artigo 7.2 da vixentes Ordenanza de acceso electrónico aos servizos provinciais da Deputación Provincial de Ourense (BOP núm. 296, de data 28.12.2009), ao estar plenamente garantido o acceso e dispoñibilidade de medios tecnolóxicos precisos conforme ao establecido nos parágrafos seguintes, polo que non se admitirá ningunha solicitude que se formule por outros medios, sendo obrigatoria a presentación de solicitudes conforme ao previsto nesta base.

A solicitude, unha vez cubertas na plataforma electrónica, presentaranse ante o Rexistro da Diputación de Ourense a través dos medios seguintes:

1) Con Certificado electrónico.

2) Sen certificado electrónico.

2.1.- En liña

2.2.- Presencialmente

1. Con certificado electrónico. Admitirase a presentación a través de calquera dos medios válidos habilitados por esta Deputación.

2. Sen certificado electrónico

Neste caso as persoas interesadas poderán presentalas de dúas formas:

1.- Directamente.- cubrirán a súa solicitude a través da plataforma informática , unha vez cuberta, poderán imprimila e levala ante calquera das oficina de Correos de España e pedir que envíen o orixinal polo SISTEMA ORVE ao rexistro da Deputación de Ourense, ou ante calquera dos outros rexistros válidos recolleitos no artigo 16.4 da Lei 39/2015, do 1 de outubro, do Procedemento Administrativo Comun das Administracións Públicas.

A persoa interesada terá 7 días naturais desde o enchemento da solicitude a través da plataforma: <http://termalismourense.com> para dirixirse a Correos ou ante calquera outro dos rexistros válidos e remitir a súa solicitude á Deputación de Ourense. Durante este prazo de 7 días naturais, a(s) praza(s) solicitada estará bloqueada ao seu favor; concluídos estes 7 días naturais sen que conste a entrada da súa solicitude por rexistro, a praza desbloquearase e quedará dispoñible. Neste caso, liberarase a retención da garantía e a persoa solicitante verá reflectido na súa tarxeta de crédito.

2.- A través dunha entidade colaboradora.- Son entidades colaboradoras os establecementos balnearios recollidos na base sétima.

A estas entidades poderán dirixirse as persoas solicitantes do Programa, completar o formulario de solicitud e facer o depósito correspondente segundo o recollido na base décimo primeira. Dende este momento entenderase preadxudicada esta(s) praza(s). Será no momento en que o solicitante chegue ao balnearios para disfrutar do servizo, cando cumprimente a favor da entidade colaboradora o documento normalizado no que lle otorga

a representación e que lle permitirá oficializar a presentación de solicitudes e acceder á subvención á que tengan dereito.

Será a entidade colaboradora á que presentes esta solicitud conxuntamente coa copia dixitalizada da representación ante calquera rexistro válido para elo en cumprimento do previsto no artigo 16.4 da Lei 39/2015, de 1 de outubro, do Procedemento Administrativo Común das Administracións Públicas.

A plataforma informática requirirá automaticamente a emenda das deficiencias consistentes na ausencia da documentación anexa prevista no presente apartado, de maneira tal que o proceso de presentación da solicitude non poderá completarse ata que dita deficiencia sexa emendada.

Non será necesario achegar ningunha documentación coa solicitude, xa que a Deputación procederá, de oficio, á comprobación dos datos do interesado necesarios para resolver o procedemento, mediante consulta nas plataformas de intermediación de datos das administracións públicas e acordo co establecido no artigo 28.2 e 28.3 da Lei 39/2015, do 1 de outubro, de Procedemento Administrativo Común das Administracións Públicas, sendo os datos obxecto de consulta os seguintes:

- 1) A identidade e data de nacemento da persoa física solicitante, a través do seu DNI ou NIE.
- 2) O municipio de empadramento do solicitante.

Non obstante o anterior, o interesado deberá achegar coa solicitude a documentación que se indica nos seguintes casos:

- 1) No suposto de persoas estranxeiras non residentes en España, deberán presentar copia electrónica auténtica do seu pasaporte.
- 2) No suposto no que o solicitante non autorice á Deputación para a consulta dos seus datos, deberá achegarse copia electrónica auténtica do seu DNI ou NIE e do seu certificado de empadramento.
- 3) No suposto en que non sexa tecnicamente posible que a Deputación efectúe a consulta dos seus datos, a Deputación poderá requirir ao interesado para que achegue a documentación necesaria.

3. En caso de dúbida, dificultades técnicas ou necesidade de máis información, os interesados poderán dirixirse á Área de Benestar da Deputación Provincial que lle prestará a asistencia precisa aos interesados, en horario de 9 a 14 horas, de luns a venres. Esta posibilidade estará dispoñible ata as 14:00 horas do último día hábil do prazo de solicitude.

Décimo terceira.- Réxime de protección dos datos achegados coa solicitude:

1.- O tratamento pola Deputación Provincial dos datos persoais achegados polos solicitantes fúndase no disposto nos apartados c) e e) do artigo 6 do Regulamento UE 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento dos datos persoais e á libre circulación destes datos, así como no artigo 6.2 da Lei orgánica 3/2018, do 5 de decembro, de protección dos datos de carácter persoal, ao ser a achega dos datos e informacións esixida nestas bases necesaria para o cumprimento do disposto na lexislación xeral de subvencións, así como para a comprobación do cumprimento dos requisitos e valoración das solicitudes consonte ao indicado nas propias bases.

En consecuencia, a negativa a facilitarlle estes datos á Deputación Provincial determinará a exclusión da persoa interesada do procedemento.

2.- En cumprimento do establecido no artigo 13 do Regulamento UE 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento dos datos persoais e á libre circulación destes datos, infórmaselles aos interesados do seguinte:

a) A responsabilidade do tratamento dos datos é da Deputación Provincial de Ourense, cuxo representante legal é o seu presidente, don José Manuel Baltar Blanco, con domicilio, para os efectos de notificacións, na rúa Progreso, n.º 32, 32003, en Ourense, teléfono de contacto 988317600/1 e correo electrónico: gabinete.presidencia@depourense.es.

b) Os datos do delegado de protección son: domicilio, para os efectos de notificacións: rúa Progreso, n.º 32, 32003, en Ourense e correo electrónico: dpo@depourense.es.

c) Os datos subministrados coa solicitude destínanse unicamente a garantir o cumprimento do establecido na lexislación xeral de subvencións, a comprobar que a persoa solicitante reúne os requisitos establecidos para poder ser beneficiaria/o, para a valoración da súa solicitude e para a xestión das correspondentes solicitudes. Ademais, e en cumprimento do establecido nos artigos 20 da Lei 38/2003, xeral de subvencións, 15 da Lei 9/2007, de subvencións de Galicia e 8.1.c) da Lei 19/2013, do 9 de decembro, de transparencia e bo goberno, a información relativa ás subvencións concedidas, alí prevista, será obxecto de publicación segundo se prevé na normativa de aplicación. Publicaranse igualmente na sede electrónica e na páxina web provincial <https://www.depourense.gal/>

As publicacións referidas manteranse durante un prazo mínimo de catro anos dende a realización da publicación, podendo, a partir dese prazo, ser suprimida de xeito motivado a publicación de oficio pola Deputación Provincial ou ben a solicitude das persoas interesadas, dirixida ao responsable do tratamento. En todo caso, as solicitudes e o resto de documentación obrante no expediente atoparanse a disposición doutras persoas interesadas no procedemento para os únicos efectos da formulación de reclamacións ou interposición de recursos que legalmente procedan contra o acto de resolución, e baixo a condición de que os datos de identidade persoal dos interesados non se poidan facer públicos.

d) A base xurídica do tratamento dos datos achegados coa solicitude é a necesidade deses datos para o cumprimento das obrigas legais que impón a lexislación xeral de subvencións, en tanto que Administración pública concedente (artigo 6.1.c) do Regulamento UE 2016/679) e, no caso dos datos para acreditación do cumprimento dos requisitos específicos da convocatoria e valoración de solicitudes, a necesidade deses datos para dar satisfacción á finalidade de interese público perseguida con esta convocatoria (artigo 6.1.e) do Regulamento UE 2016/679).

e) Os datos subministrados á Deputación Provincial serán tratados polo persoal autorizado para a tramitación da solicitude, suxeitos ao deber de reserva salvo os referidos ao nome, apelidos e número de teléfono móbil que lle serán comunicados, no momento da concesión da subvención, aos balnearios, entidades colaboradoras, para que poida tramitar as solicitudes de estancias e/ou tratamentos correspondentes e dar cumprimento así o obxectivo último deste programa.

Estes datos poderán ser cedidos a terceiras persoas nos seguintes casos:

- Ao resto de solicitantes ou os seus representantes legais cando así o reclamen para a formulación de reclamacións ou interposición de recursos contra o acto de adxudicación.

- A membros da corporación que o soliciten, aos xulgados e tribunais, para os efectos da resolución dos recursos xudiciais que poidan interpoñerse contra a decisión de adxudicación, así como ao Ministerio Fiscal, Valedor do Pobo, Defensor del Pueblo, Tribunal de Cuentas e Consello de Contas, na medida en que sexa necesario para o exercicio das funcións destas autoridades públicas.

- Ás persoas que o soliciten ao abeiro do disposto na Lei 19/2013, do 9 de decembro, de transparencia e bo goberno, tras o previo expediente contradictorio con audiencia da persoa interesada titular dos datos e nos termos previstos na dita lei.

f) En ningún caso se transferirán os seus datos persoais a un terceiro país nin a unha organización internacional.

g) Os datos subministrados conservaranse nos arquivos da Deputación Provincial de forma indefinida, para os únicos efectos da súa conservación conforme ao disposto na lexislación sobre arquivos do sector público e na lexislación sobre patrimonio documental cultural.

h) As persoas interesadas poderán solicitar en todo momento da Presidencia da Deputación o acceso aos seus datos, así como a súa rectificación, de ser o caso. Poderá solicitarse a limitación do tratamento dos ditos datos, referida á súa publicación, unha vez transcorrido o prazo de catro anos previsto nestas bases. Poderá formularse igualmente a oposición ao tratamento dos datos, motivada pola situación particular do interesado, nos termos previstos no artigo 21 do Regulamento UE 2016/679.

Os dereitos sinalados neste apartado poderán exercerse mediante un escrito dirixido á Presidencia da Deputación Provincial. De conformidade co disposto no artigo 20.3 do Regulamento UE 2016/679, non será de aplicación o dereito á portabilidade dos datos subministrados á Deputación Provincial neste procedemento.

i) En todo caso, as/os interesadas/os poderán formular as reclamacións que consideren oportunas en relación co tratamento dos seus datos persoais ante a Axencia Española de Protección de Datos.

j) A falla de subministración á Deputación Provincial dos datos persoais requiridos, ao constituír un requisito legal para a selección dos/as beneficiarios/as, dará lugar á súa exclusión do procedemento.

k) En ningún caso se procederá á adopción de decisións automatizadas nin á elaboración de perfís persoais cos datos subministrados, que non serán obxecto de tratamentos diferentes aos expresamente previstos nesta cláusula.

Décimo cuarta.- Xestión de solicitudes e concesión de subvencións.

A área de Benestar da Deputación de Ourense xestionará as solicitudes presentadas a través do rexistro, concedéndose as subvencións conforme co sinalado nesta base, en función da dispoñibilidade de prazas existentes en cada momento, determinada polo crédito orzamentario dispoñible.

As subvencións adxudicaranse, seguindo a orde de prelación establecido pola data e hora de presentación ante o rexistro da solicitude beneficiaria da subvención. Este código data/hora será xerado de forma automática pola plataforma informática por cada solicitude que se presente.

A información sobre o número de prazas dispoñibles en cada momento será pública e accesible de maneira permanente a través da plataforma informática.

A xestión electrónica das solicitudes realizarase cada venres (semanalmente) e referirase a todas as solicitudes presentadas entre 00.01 horas do venres anterior ao da valoración ata as 23:59 horas do xoves previo ao venres de valoración. O sistema determinará a cualificación como “conforme con subvención Deputación”, ou “excluída”, en atención a que cumpran cos requisitos de acceso esixible para cada Programa ou non, e da existencia de crédito orzamentario dispoñible.

As solicitudes que sexan conformes integrarán unha lista ordenada, na que se incluírán todas as que foron obxecto de xestión trimestralmente, como máximo, quedando automaticamente concedidas as subvencións correspondentes.

A listaxe non será obxecto de notificación individual, que será substituída pola súa publicación na sede electrónica da Deputación Provincial, ao amparo do establecido no artigo 45.2.b) da Lei do Procedemento Administrativo Común das Administracións Públicas. Con todo, advertirase mediante correo electrónico ou sms aos interesados que fagan constar a súa dirección de correo electrónico ou teléfono móbil na súa solicitude. En todo caso, os interesados poderán dirixirse en todo momento á Área de Benestar da Deputación Provincial que facilitará a información precisa, en horario de 9.00 a 14.00 horas, de luns a venres.

Décimo quinta.- Normativa de aplicación.

No non disposto nas presentes bases, será de aplicación o establecido na vixente lexislación reguladora das subvencións provinciais.

No caso de particulares, pódese interpoñer, potestativamente, un recurso de reposición ante a Xunta de Goberno desta Deputación, no prazo de 1 mes, como trámite previo ao contencioso-administrativo, ou ben directamente un recurso contencioso-administrativo, ante o Xulgado Provincial do Contencioso- Administrativo, no prazo de 2 meses, sen que se poidan compaxinar ambos os dous recursos. Os prazos indicados computaranse a partir do día seguinte ao da publicación deste anuncio no BOP.

No caso de administracións públicas, pódese interpoñer un recurso contencioso-administrativo no prazo de dous meses ante o Xulgado do Contencioso-Administrativo de Ourense. Ademais, ao abeiro do disposto no artigo 44 da Lei reguladora da xurisdición contencioso-administrativa, poderá formularse requirimento de anulación ou revogación do acto, no prazo de 2 meses e con carácter previo ao exercicio de accións en vía contenciosa. Os prazos indicados computaranse a partir do día seguinte ao da publicación deste anuncio, tendo en conta que o prazo para a interposición do recurso contencioso-administrativo, no caso de que se formule o requirimento previo-, contará desde o día seguinte a aquel no que se reciba a comunicación do acordo expreso sobre o dito requirimento ou se entenda presuntamente rexeitado.

Non obstante o anterior, poderá interpoñerse calquera outro recurso que se estime pertinente.